



É neste bosque onde a sombra do tempo está carpindo. É neste bosque, neste cheiro de abrótemas, neste miúdo caravel que abrolla, é neste bosque: Aquí encontrara o corazón a fonte; aquí a silveira cobre os despoxos de ouro calcinados do que foi o amor. Cantan as rulas tristísimas da vida. Un fondo revoar de asas tan lenes sobre esa hora que pasou, eterna, que agora tremelece na soiedade, e un corpo nu de orvallo aterecido cruza na luz: ouvide un astro a deslizar-se no claror da aurora...

Outro vento viñera á miña man, outra raiola ferira-me nos ollos  
docemente,  
ollai-me a transparéncia. É neste souto  
onde o transfondo dun sabor a guinda deixa o sinal na glándula e no  
canto.

Orvalla  
tan miudiño na felicidade!

*En recordo de Avilés de Taramancos, galego, poeta e home, recentemente falecido. Da súa obra **As torres no ar**.*

